


**15 DECEMBRIE**

**SLUJBA  
SF. PREOT  
DIMITRIE  
GORSKI  
DE LA OSINOV**

**MINEIUL-RU**



# Служба святому праведному Димитрию Горскому, Осиновскому затворнику

## *Вечер*

### *на Господи возвах, стихиры, глас 4*

Благодатию божественною, / яко источником  
неоскудным, / напояеши жаждущих спасения. /  
Изсохшия души оживляюще, / окаменелыя  
сердца умягчаеши, / скверну греховную  
омываеши / и благоплодными сотворяеши /  
сердца чтущих тя усердно, / отче Димитрие  
преславне.

Мира лукаваго отвратився, / Единому Господу  
служити восхотел еси, / яко же спасительное  
прибежище обретше, / затворническим житием  
безстрастия достиг еси, / преподобных похвало  
и радование, / верных покров и веселие, / наше  
же крепкое заступление, / отче Димитрие

преславне.

Сосуд благодати Духа Святаго, / тя, преславне,  
Господь сотвори. / Верою бо крепкою сияеши, /  
смирением велием благоухаеши, / святостию же  
верных сердца озаряеши. / Покаяния же образ  
показуя, / на милосердие Божие уповати  
наставляеши нас, / отче Димитрие преславне.

### ***Слава, глас 8***

Кто не восхвалит богоугодное житие твое, кто не  
прославит подвиги твоя. Умом бо в горняя  
возлетевши, ангельское житие на земли показал  
еси, о погибающих же душах болезнуя,  
богоугодному житию верныя наставлял еси.  
Ныне же предстоя Христу Богу, молися  
прилежно о чтущих тя.

### ***И ныне, Богородичен:***

Радуйся, Богоизбранная Отроковице; радуйся,  
Невесто Невестная. Радуйся, Мати Христа  
Бога нашего; радуйся, Агнице, рождшая Агнца  
Христа. Радуйся, Честнейшая херувим; радуйся,  
Славнейшая серафим. Радуйся, огнезрачный  
Престоле Господень; радуйся, Носившая  
Носящего вся. Радуйся, верныя заступающая;  
радуйся, погибающая спасающая. Радуйся, вся  
покровом Своим покрывающая, Мати Божия.

## ***Крестобогородичен:***

Сына Своего возлюбленного на кресте зряще,  
Мати Божия, плачущи глагола еси: Чадо, что  
се страждеша плотию и Мя Едину оставляеши;  
потщися прославиться, яко да возвеличуся  
страстию Твоею.

### ***На стиховне стихиры, глас 1***

Наста преславное торжество, / верных сердца  
возвеселяющее, / преславная память / угодника  
Христова Димитрия, / егоже прославляюще, /  
молимся о спасении душ наших.

Стих: Честна пред Господем смерть  
преподобных Его.

Страсти безсловесныя умертвив, / плоть духови  
покорил еси, / преславный угодниче, / праведне  
отче Димитрие, / со ангелы и святыми  
предстояще, / молися прилежно Богу / о  
спасении душ наших.

Стих: Блажен муж бояйся Господа, в заповедех  
Его восхощет зело.

Свыше укрепляем, / яко добрый воин Христов, /  
на лютую брань со врагом нашего спасения /  
безбоязненно потекл еси, / смирением и  
молитвою силу вражию попяюще, / слезными  
токи коварство нечистых попяюще, / отче  
Димитрие, / молися прилежно / о душах наших.

## **Слава, глас 8**

Верных множества наставником благочестия явился еси, праведне отче Димитрие, заповеди Господни исполняти наставляюще, греха же яко огненнаго запаления, отбегати научающе, милостыню и всякое благо творити заповедав, молитвенник теплейший показался еси о спасении душ наших.

### ***И ныне, Богородичен:***

Безневестная Дево, яже Бога неизреченно заченши плотию, Мати Бога Вышняго, Твоих рабов мольбы приими, Всенепорочная, всем подающи очищение прегрешений: ныне же наша моления приемлющи, моли спастися всем нам.

### ***Крестобогородичен:***

Горце рыдаше Пречистая, распятие Твое, Господи, зряще; и глаголаше Ти со слезами: О, Сыне Мой, како Мя едину оставляеши, тщишия Мене безчадну сотворити, воскресни и прославлюся, и воспою велие милосердие Твое.

### ***На литии самогласны, глас 8***

Приидите верных множества, / восхвалим покаяния проповедника, / пустынных отцев

жития рачителя, / христианского благочестия  
наставника, / великославного Димитрия, / имже  
ныне земля Луганская / яко безценным  
камением украсися. / Егоже прославляюще, /  
Господу благодарение возносим.

Веселися земля Луганская, / ликуйте осиновстии  
и новопсковстии людие, / се бо в Церкви  
Православней / новый светильник возсия, /  
великославный затворник Димитрий, / его же  
молтвы непрестаннии / яко фамиям  
благоуханный ко престолу Божию восходит. /  
Его же прославляюще, / Господу благодарение  
возносим.

### ***Слава и ныне: глас тойже***

Звезду на востоце зряще, / волсви от востока  
преидоша / поклонитися от Девы Рождшемуся /  
Спасу Христу и Богу. / Егда же узреша  
Богомладенца на руцех Пречистыя, / велия  
радости исполнившись, / принесши же золото,  
ливан и смирну, / во свою страну отыдоша, /  
славяще Рождшагося Господа.

### ***Тропарь, глас 4***

Пустыннаго жития ревнитель явился еси, /  
затворническаго жития подвиг добре понесши, /  
от Господа же благодатныя дары прияв, /  
спасения многих благий виновник показался

еси, / праведне отче Димитрие, / моли Христа Бога / спастися душам нашим.

***Слава, и ныне, Богородичен или  
Крестобогородичен.***

## ***На утрени***

***на Бог Господь, тропарь тойже.  
По первом стихословии седален, глас 2.***

Сокровенныя подвиги и труды подъявше, древним преподобным благий подражатель явился еси, храмом Пресвятей Троице душу свою соделавше, и паче света солнечного святостию просиявше, ныне со праведными веселишися, Димитрие преславне. (Дважды).

***Слава, и ныне, Богородичен:***

Бедствующия рабы Твоя спаси Богоодице, Тебе бо скорую Помощницу имуще и на Твое матернее милосердие всегда уповающе, от вечныя погибели Тобою избавляемся, Мати Божия.

## ***По втором стихословию, глас 1***

Праведного жития образе и любви ко Господу зеркало, праведне отче Димитрие, молися прилежно, да будем подражати богоугодному житию твоему. (Дважды).

### ***Слава, и ныне, Боородичен:***

Пресвятая Дево, выше ангельских чинов на небесех показала еси, Милосердною Матерью на земли явилася еси; от погибели вечныя, имя Твое преславное призывающих, всегда избавляющая.

### ***По хвалите Имя Господне припев:***

Величаем тя, святой праведный отче Димитрие, и чтим святую память Твою, ты бо молиши о нас Христа Бога нашего.

### ***Псалом избранный: Терпя потерпех Господа.....***

### ***По полцелее, седален, глас 5***

Возсия днесь память святаго затворника Димитрия, сей бо теснотою пещерною пространства небесного достигнув и достойныя награды от Господа сподобився, ныне усердныя молитвы возносит о спасении нашем. (Дважды).

***Слава, и ныне, Боородичен:***

Велие Свое милосердие показующи, от Чистыя Девы, Господи, плоть Свою восприял еси, да род человеческий спасеши от погибели вечныя: Господи, слава Тебе.

***Степенна, 1 антифон, 4 гласа***

Прокимен: Честна пред Господем смерть преподобных Его.

Стих: Что воздам Господеви о всех, яже воздаде ми.

***Всякое дыхание:***

***Евангелие преподобническое:***

***По 50 псалме стихира глас 6.***

Праведне отче Димитрие, яко звезда пресветлая явился еси, землю Русскую озаряюще. Верныя же лучами благодати облиставая, ко исправлению жития и покаянию наставляеши, болящия пречудно исцеляеши, и во всяких нуждах скорый помощник являеши, да прославляется Имя Христово тебе ради.

## Канон, глас 8

### Песнь 1

*Ирмос: Воду прошед яко сушу и египетскаго зла избежав, израильтянин вопияше: Избавителю и Богу нашему поим.*

Припев: Святой праведный отче Димитрие, моли Бога о нас.

Ангельских ликов и святых соборов сожителю, радуйся Димитрие, яко пресветлый светильник святости явился еси, вся притекающия к тебе просвещай.

Благочестнаго жития наставниче, радуйся, тобою бо житие исправляюще, угождати Господу научаемся.

Слава: О согрешении своем велие покаяние принесши, мир душевный обрел еси, спасению многих добре потрудився.

И ныне: Богородице Марие, Неисусомужная Мати, молися прилежно о спасении нашем Рождшемуся из Тебе.

### Песнь 3

*Ирмос: Ты еси утверждение притекающих к Тебе, Господи, Ты еси свет омраченных и поет Тя дух мой.*

Мирскаго жития прелести отбегше, уединеннаго

жития ревнитель показался еси, в молитве  
непрестанно пребывающе.

Ангели дивятся предивному житию твоему, отче  
наш Димитрие, человецы же память твою ныне  
чтуще, похвальныя песни ти приносят.

Слава: Воин Христов добропобедный, на брань  
со духи нечистыми неустрашимо подвинулся  
еси, отче Димитрие, радуйся, от Господа бо тебе  
победа даровася.

И ныне: Во объятиях Своих носивше Создателя  
мира, Мати Божия, ширшая небес показала  
еси, необъемлемаго объемлюще.

#### ***Седален, глас 4***

Сердцем своим горе возвысився, восстания  
плоти, мира и диавола преславно сокрушил еси,  
праведне Димитрие. О погибающих же душах  
болезнующ, сладостию медоточных уст своих  
горесть греха на сладость покаяния преложил  
еси, ко спасению усердно наставляюще, сего  
ради чтим тя, преславне.

#### ***Слава, и ныне, Богородичен:***

От враг видимых и невидимых покровом Твоим,  
Богородице, покрываемии, прославляем  
матернюю любовь Твою и вопием усердно:  
радуйся, спасение душ наших.

## **Крестобогородичен:**

Пресвятая Дево, кто достойно возможет изреши скорбь велию Твою, егда видела распинаема Сына и Бога Своего, Его же моли прилежно о спасении нашем.

### **Песнь 4**

*Ирмос: Услышах, Господи, смотрения Твоего таинство, разумех дела Твоя и прославих Твое Божество.*

Преподобных последователю, радуйся Димитрие, яко постом и молитвою лукаваго далече от себе отгнал еси, козни его яко паучину растерзающе.

Смирение зело возлюбивше, о своем недостойнстве всегда помышляя еси, ныне же на небесех и от земных достойно прославляешься, Димитрие преславне.

Слава: Слезныя токи, яко питье имеюще, душу словесами божественными напитал еси, ныне же лицезрением Сладчайшаго Иисуса наслаждаяся, молишися о помиловании нашем.

И ныне: Препоблагословенная Владычице, радуйся, Тобою бо весь род человеческий спасется и глава древняго змия сотрется преславным Рождеством Твоим.

## **Песнь 5**

*Ирмос: Утреннююще вопием Ти: Господи, спаси ны: Ты бо еси Бог наш, разве Тебе иного не вемы. Земли Луганския похвало и веси Осиновския украшение, радуйся, отче праведне, яко верных сердца радости исполняеши и вечнаго блаженства искати наставляеши, моляся о спасении нашем.*

*Лучами благодатныя помощи озари души наша, грехми помрачении, да тобою укрепляеми, путем тесным спасительным неослабно шествовати будем.*

*Слава: Аще и в волнах житейскаго моря на всяк день потопляеми есьмы, в тебе, отче Димитрие, тихое пристанище спасения обретаем, руку помощи от тебе приемлюще.*

*И ныне: Всемилостивая Заступнице, Мати Всепетая, подаждь от Бога спасение нам грешным, купно со праведным Димитрием о нас Того моля.*

## **Песнь 6**

*Ирмос: Молитву пролию ко Господу и Тому возведу печали моя, яко зол душа моя исполнися и живот мой аду приближися, и молюся яко Иона: от тли Боже возведи мя.*

*Сребролюбия отбегающе, нищету в сокровище вменял еси, образ верным показующе, да*

нетленное богатство искати будут.

Слышавше о твоём предивном житии, отче Димитрие, боголюбивии людие умиляхуся сердцем, любовью ко Христу пламенеюще.

Слава: Усердию ко храму Божию люди научающе, образ верным явился еси, службы церковныя неустанно посещающе. тем же и нас, во тьму лености погруженных, сия богоугодныя ревности исполни.

И ныне: Радуйся, прибежище верным; радуйся, скорящих Радосте; радуйся Матернее попечение о нас всегда имущая, яко и по Успении Своем нас не оставляеши.

### ***Кондак, глас 3***

Светло празднуя, ликовствует земля Луганская, /  
покровом молитв твоих от бед покрываемая. /  
Преславне угодниче Димитрие, / праведным  
житием Церковь Христову украсил еси, / мощи  
же святыя нам на утешение оставив, / токи  
благодати от них неоскудно источаеши, /  
болящия скоро исцеляеши, / всем чтущим тя  
скорую помощь даруеши, / да прославляется  
Имя Христово во веки.

### ***Икос***

Талант ти Господом дарованный преумножив,  
подвиги своими яко сокровищем украсился еси,

плодами же духовными изобилуя, алчущия спасения добре напитал еси, сердца их любовью ко Христу исполняюще. Сего ради похвальныя песни тебе приносяще, радостно вопием: Радуйся, Димитрие, наставниче наш и покровителю.

## **Песнь 7**

*Ирмос: От Иудеи дошедше отроцы в Вавилоне иногда, верою Троическою пламень пещный попраша, поюще: отцев Боже, благословен еси.* Святе Димитрие, радуйся, яко Царствия Небесного достигл еси, душею праведною воспаривше в горняя селения, идеже ныне пребывающе, не забуди любовь чтуция тя. Егда прозрел свое скорое от земли отшествие, Таин Христовых причастился еси, душу со Христом соединивше, сего и нас, угодниче Божий, сподоби.

Слава: От враг видимых и невидимых огради нас, отче Димитрие, да непреткновенно шествуя ко спасению, вечнаго блаженства достигнути да сподобимся.

И ныне: Премилостивая Мати Божия, от греховныя язвы исцели ны недугующия, да здрави телом и душею, радости вечныя улучшить сподобимся.

## **Песнь 8**

*Ирмос: Богоглаголивии отроцы в пеци, со огнь пламень попирающе пояху: благословите дела Господня Господа.*

О страждущих от смертоносных язвы милосердую, скорую помощь даровал еси, сего ради тя, яко угодника Божия, прославляем. Радости велия исполняяся, людие осиновстии благоговейно мощи твоя взявше, со свещами и пением ко храму принесоша, память твою усердно чтуще.

Слава: Яко светильник пресветлый, мощи своя святые верным даровал еси, мрак греховный от чтущих тя далече отгоняюще.

И ныне: Вода неисчерпаемая еси, Богородице, от скверны греховных верных омывающая, жаждущия же спасения напоющая благодатию Сына и Бога Своего.

## **Песнь 9**

*Ирмос: Устрашися всяк слух неизреченна Божия снисхождения, яко Вышний волею сниде даже и до плоти, от Девическаго чрева быв человек: темже Пречистую Богородицу вернии величаем.* Стрелами греховными души своя уязвленни имуще, к тебе прибегаем, отче Димитрие, яко да подаси исцеление нам, верою и любовью тя чтущим.

Столп праведности, Церковь Христову украшающий, явился еси, святе Димитрие, нас в вере укрепляюще, да мысленнаго фараона избегнути возможем.

Слава: Шипок благовонный райских обителей, радуйся, Димитрие, всем нам радость подающий, молитвами же своими пленения греховнаго нас избавляющий.

И ныне: Богородице Дево, избави от бед рабы Твоя, да уповающе на Тя не посрамимся.

### ***Светилен.***

Звезда пресветлая, Церковь Христову украшающая, явился еси, отче Димитрие, во мраце греховнем путь спасения нам указующе, сего ради чтим и воспеваем тя усердно.

### ***Богородичен:***

От икон Своих источаеши чудеса, Пресвятая Дево, нас в вере и любви Христовой укрепляюще; матернюю же любовь изливающе, да геены огненные избегнем.

### ***На хвалитех стихирь, глас 2***

Помощниче скорый и недугов врачевателю, милости сокровищнице и в нуждах житейских изрядный споспешниче, Димитрие преблаженне, услыши ны, вопиющия ти, и от

скорбей и болезней избавление нам даруй. (Дважды).

Храм священный Пресвятая Троицы явился еси, отче Димитрие, в житии своем душу от вожделений греховных очистив и добродетельми многими украсив, благодатию же Святаго Духа освятился еси. Сего ради прими сия возносимья тебе похвалы и очищение от скверны греховныя нам даруй.

Радости духовныя исполняемся, мощи твоя святая лобызающе, от них же целебную силу приемлюще, молим тя, святе Димитрие, от недугов душевных и телесных исцеление нам даруй.

### ***Слава, глас 6***

Праведне отче Димитрие, в житии своем слезами многими грехи омыл еси, в сердце же память страстей Христовых всегда имеюще, плоть со страстьми и похотьми распял еси, крест тяжкий и многоскорбный терпеливно понесши, ныне же, предстоя престолу Царя Славы, славою небесною сияеши.

### ***И ныне, Богородичен:***

На небеса с плотию возшедше, на земли сущих не оставила еси, Богоизбранная Отроковице. Покровом же честным рабы Своя покрывающе и

токи слез источающе, от бед и погибели вечныя избавление всем подаеши.

***Крестобогородичен:***

Пречистая Богородице, зряще Сына Своего на кресте повешена, горце плачуще глаголала еси: Боже и Сыне мой, како терпиши страсть поносную.